

## THE FAITHFULNESS OF GOD

Ang Dios hilig gayod siya nga mosaad. Iya kining gihimo aron kitang mga tawo madasig sa pagsunod kaniya. Mao nga daghan kaayog mabasa nimo sa Biblia mahitungod sa mga saad sa Dios. Ug kon siya mosaad makalaom gayod ka nga tumanon gayod niya ang iyang mga saad kay Dios man siya nga matinud-anon. Busa makalaom gayod kita nga tumanon gayod niya ang iyang mga saad. Lahi kanatong mga tawo nga daghan kitag gisaad apan wala nato tumana kay atong kanaiya nga mapakyasan. Mao nga dunay kanta nga nag-ingon 'Gihimo mo lang saad aron lang pakyason'. Apan lahi ang Dios kay kon mosaad siya, iya gayod kining tumanon sa madugay mana o sa madali, iya gayod kining tumanon sa tukmang panahon nga iyang gitagal. Kay mao kini ang kinaiya sa Dios. Bisan pag dili kita magpatinumanon, ang Dios magpabilin nga matinumanon.

**2 Timoteo 2:13(MBB) "Kon kita dili magmatinumanon, magpabilin siyang matinumanon, kay matinud-anon man siya."** Kini nga bahin sa Biblia nagsulti kanato sa klaro mahitungod sa kinaiya sa Dios. Kinaiya gayod niya ang pagkamatinumanon.

**Psalms 145:9, 13(NIV) "The Lord is good to all; he has compassion on all he has made... (13)Your kingdom is an everlasting kingdom, and your dominion endures through all generations. The Lord is faithful to all his promises and loving toward all he has made."**

**Salmo 145:9, 13(ABMBB) "Maayo siya sa tanan ug maluluy-on sa tanan niyang binuhat... (13)Magpadayon ang imong gingharian ug maghari ka hangtod sa kahangtoran. Motuman gayod ang Dios sa iyang mga saad, ug makita ang kamaayo niya diha sa tanan nga iyang gibuhat."** Kining Salmo 145 usa kini sa mga Salmo ni David nga naghigut sa pagkamatinud-anon sa Dios. Sumala niya nga ang Dios motuman gayod sa iyang mga saad. Ang ikaduhang bahin sa bersikulo 13 nag-ingon "**Motuman gayod ang Dios sa iyang mga saad**" kini nagpasabot nga nakasulti si David niini tungod kay nasinati niya mismo ang mga saad sa Dios ngadto sa iyang kinabuhi nga iyang gituman. Ug makita nimo ang kamaayo sa Dios pinaagi sa mga butang nga iyang gibuhat. Mao kini ang giingon sa kataposang bahin sa bersikulo 13 nga nag-ingon "**Motuman gayod ang Dios sa iyang mga saad, ug makita ang kamaayo niya diha sa tanan nga iyang gibuhat.**" Kon tan-awon lang gayod nimo ang mga butang nga makita sa atong palibot makita gayud nimo ang kamaayo sa Dios sa atong mga kinabuhi. Makita nimo kini matag adlaw.

**Pagbangotan 3:22-23(MBB) "Dili gayud molubad ang gugma sa Ginoo ug walay kinutoban ang iyang kaluoy; bag-o kini adlaw-adlaw. Pagkamatinunmanon gayod niya."**

Ang pag-ingon nga "**bag-o kini matag adlaw o bag-o kini adlaw-adlaw**" kini nagpasabot nga ang kaluoy ug ang pagkamaayo sa Dios sa atong mga kinabuhi makita nimo matag-adalwa, nasinati nimo kini kada-adlaw. Kana lang hangin nga atong gihanggab matag sekondo nga walay bayad, usa na kana ka pagpadayag sa kaayo sa Dios. Kana lang pagsidlak sa adlaw matag adlaw, usa na kana ka dakong pamatuod nga maayo ang Dios ug matinumanon siya sa atong mga kinabuhi. Dili lang kay hatagan ta niyang kahayag sa adlaw kondili iya sad kining paulanon. Walay tawo nga makahimo niini. Ug dili lang kay kini ra, daghan pa kaayo nga mga butang nga imong napahimuslan matag adlaw nga hatag sa Dios.

**Mateo 5:44-45 "Apan karon sultihan ko kamo: higugmaa ang inyong mga kaaway ug pag-ampo kamo alang sa mga tawo nga nagpasipala kaninyo, (45)aron makita nga matuod kamo nga mga anak sa inyong Amahan nga atua sa langit. Kay siya, sa walay pagpili, nagpasidlak sa iyang adlaw ug naghatag ug ulan ngadto sa mga matarong ug sa mga makasasala."** Kini nagpakita lamang kanato unsa kamaayo ang Dios sa mga tawo bisan pa sa mga daotan. Bisag daotan man ka nga tawo, iya gihapon kang gipasidlakan sa adlaw ug gihatagag ulan. Busa kini dayag kaayo nga nagpakita sa pagkatinud-anon sa Dios sa atong mga kinabuhi. Kon ato lang gayod nga panid-an ang mga panghitabo sa atong palibot kon unsay gibuhat sa Dios makaingon gayod ka nga maayo kaayo ug matinud-anon ang Dios sa iyang saad sa atong kinabuhi.

**Buhat 14:17 "Apan kanunay siyang nagpamatuod sa iyang kaugalingon pinaagi sa maayong mga butang nga iyang gibuhay ug naghatag siya kaninyog ulan ug mga panahon nga abunda sa abot ug gihatagan kamo niyang pagkaon ug gipuno ang inyong kasingkasing sa kalipay."** Kini nga bersikulo nagsulti kanato nga kanunay ang Dios nagpamatuod ug nagpadayag sa iyang kaugalingon nga maayo siya kanato pinaagi sa paghatag niya kanatog ulan ug init aron matubo ang aytong mga tanom aron kita adunay makaon ug makabaton ug kalipay sa atong mga kasingkasing. Wala magkulang ang Dios ngari kanato kon pagkamatitud-anon ang atong hisgutan. Naghinobra ang gipakita ug gipasinati nga kaayo sa Dios sa atong mga kinabuhi. Busa takos lamang gayod nga ato siyang pasidunggan ug pasalamat sa kanunay.

**Salmo 103:11 "Ingon kahabog sa langit ibabaw sa yuta, mao usab kadako ang iyang gugma kanila nga may pagtamod kaniya."** Kini nga bersikulo nagsulti kanato unsa ka dako ang gugma sa Dios ngari kanato. Hangad sa langit ug tan-awa kini unsa kahabog gikan sa yuta nga imong nahimutangan, ingon niana pagdescribe sa Biblia ang gugma sa Dios ngari sa atong mga kinabuhi. Busa wala gayod kitay rason nga dili magpasalamat ug magdayeg kaniya kay dayag man kaayo nga ang Dios matitud-anon kanato sa iyang mga saad. Busa bulahan gayod ka kon mosalig ka sa mga saad sa Dios bisan unsang sitwasyon sa imong kinabuhi.

**Salmo 146:5-6(MBB) "Bulahan ang tawo nga sa iyang mga kinahanglan nagsalig sa Dios ni Jacob, aron tabangan siya sa Ginoo nga iyang Dios nga maoy nagbuhay sa langit ug sa yuta, sa dagat, ug sa tanan nga anaa niini. Motuman siya kanunay sa iyang mga saad."**

Kini nagpasabot kanato sa klaro nga kon mosalig ka lang sa Dios sa tanang sitwasyon sa imong kinabuhi, kon mosalig ka lang sa Dios sa tanang modangat nga mga panghitabo sa imong kinabuhi, dili gayod ka magmahay, makalaom gayod ka nga tabangan ka sa Dios kay Dios siya nga motuman kanunay sa iyang mga saad. Daghang panahon nga dili nato masinati ang kaayo ug ang pagkamatitud-anon sa Dios tungod kay daghang panahon nga nagkulang kita sa pagsalig kaniya. Wala kita makahulat sa iyang panahon. Apan kon kita mosalig lamang gayod sa Dios sa bisan unsang sitwasyon sa atong kinabuhi masinati gayod nimo ang pagkakahihulungan sa Dios.

Ang Dios hilig siya nga mosaad ug mga panalangin niadtong motuman sa iyang kagustohan aron pagdasig sa tawo nga mosunod kaniya bisan unsay mahitabo. Ug hilig usab siya mosaad ug silot niadtong dili motuman sa iyang kagustohan aron mahadlok ang tawo sa pagsupak sa iyang mga sugo. Nagpasabot, God's faithfulness has two sides: a) Faithful to bring blessings to those who will obey His will. b) Faithful to bring judgment to those who will disobey His will. Sama pananglit sa panahon ni Noe may gisaad ang Dios ngadto kang Noe aron sa pagsilot sa katawhan.

### **I. GOD'S PROMISE TO NOAH**

**Genesis 6:3, 9, 11-14, 17 (3)Unya ang Ginoo miingon, 'Dili ko tugotan ang tawo nga mabuhi hangtod sa kahangtoran kay tawo lamang siya. Sukad karon kutob ra gayod sa 120 ka tuig ang ilang kinabuhi... (9) Mao kini ang sugilanon mahitungod ni Noe nga usa ka matarong nga tawo. Siya lamang ang gikahimut-an sa Dios niadtong panahona kay nagmatinumanon man siya sa Dios... (11)Apan ang katawhan daotan atubangan sa Dios ug ang kalibotan napuno sa ilang pagkadaotan. Gitan-aw sa Dios ang kalibotan ug nakita niya nga ngil-ad kini kay daotan man kaayo ang binuhatan sa mga tawo. Unya ang Dios miingon kang Noe, 'Nakahukom ako sa paglaglag sa tanang tawo. Puohon ko sila sa hingpit kay ila mang gipadagsang sa kalibotan ang ilang daotang mga buhat. Busa paghimog arka gikan sa kahoy nga goper... (17)Palonupan ko ang kalibotan aron pagpuo sa tanang binuhat. Ang tanan nga anaa sa ibabaw sa yuta mangamatay.'**

Kini nagpasabot nga misaad ang Dios nga silotan niya ang katawhan panahon ni Noe tungod sa ilang pagkadaotan. Ang bersikulo 3 nag-ingon **“Unya ang Ginoo miingon, ‘Dili ko tugotan ang tawo nga mabuhi hangtod sa kahangtoran kay tawo lamang siya. Sukad karon kutob ra gayod sa 120 ka tuig ang ilang kinabuhi... Ang pag-ingon “Sukad karon kutob ra gayod sa 120 ka tuig ang ilang kinabuhi”** nagpakita kini sa taas nga pailob sa Dios. Anhi makita nimo unsa kamaayo ang Dios bisan pa sa kadaotan sa mga tawo sa panahon Noe. Gihatagan sa Dios ang katawhan ug taas-taas nga kahigayonan nga makahinulsol sa ilang mga sala. Imagine nakapailob pa siya kutob sa 120 ka tuig usa pa niya palunopi ang kalibotan aron pagsilot sa mga tawo. Ug sulod niining 120 ka tuig gipawalihan pa sila ni Noe mahitungod sa plano sa Dios nga laglagon ang kalibotan pinaagi sa lunop tungod sa ilang pagkadaotan. Apan tungod pagkatig-a sa ilang mga kasingkasing gipalunopan gayod sa Dios ang tibuok kalibotan. Gipawalihan sila sa Dios pinaagi kang Noe aron makaamgo ug mobalik sa Dios. Kini nagpasabot lamang gayod kanato nga kon mosaad ang Dios iya gayod kining tumanon madugay man kini o sa madali. Ug kini nga panghitabo sa Daang Tugon, gigamit usab kini apostol Pedro sa iyang panahon isip pasidaan nga ang Dios maayo apan dili siya magpanuko sa pagsilot niadtong dili motuman kaniya. Ug tumanon gayod sa Dios ang iyang pasidaan.

**2 Pedro 3:5-7, 10, 12-15(ABMBB) “Gituyo nila ang dili pagtagad niining maong kamatuoran: nga kaniadto gibuhat sa Dios ang langit ug ang yuta pinaagi sa iyang pulong. Ang kalibotan gibuhat gikan sa tubig ug pinaagi sa tubig; ug pinaagi usab sa tubig sa lunop ang kalibotan gilaglag. Apan pinaagi usab sa pulong sa Dios ang kalangitan ug ang yuta nga atong nakita karon gitagana aron laglagon pinaagi sa kalayo. Giandam kini alang sa adlaw nga ang mga daotan hukman ug laglagon... (10)Apan ang Adlaw sa Ginoo moabot sama sa usa ka kawatan. Nianang Adlaw ang kalangitan mahanaw uban sa kusog nga dinahunog ug ang mga butang mosilaob ug maugdaw ug ang yuta mahanaw uban sa tanan nga anaa niini... (12)Samtang maghulat kamo sa Adlaw sa Dios nga ang mga langit mosilaob ug maugdaw ug ang mga butang mangatunaw tungod sa kainit. (13) Apan nagpaabot kita sa bag-ong kalangitan ug ang bag-ong yuta diin maghari ang katarong. (14)Busa, mga higala, samtang nagpaabot kamo niadtong Adlaw, paningkamot kamo pag-ayo nga mahimo kamong putli ug dili masaway sa Dios, ug may panagdait kaniya. (15)Ug isipa ang pagpailob sa atong Ginoo nga usa ka kahigayonan nga iyang gihatag kaninyo aron maluwas kamo...”**

Kini nagpasabot nga gi-compirma gayod ni apostol Pedro nga dunay nahitabo nga lunop sa tibuok kalibotan sa Daang Tugon isip pagsilot sa ilang pagkadaotan. Ug miingon siya nga kining kalibotan karon nga atong nakita gitagana aron laglagon dili na pinaagi sa tubig kondili pinaagi na sa kalayo. Giandam kini alang sa adlaw nga ang mga daotan silotan sa Dios. Busa usa kini ka pasidaan kanato karon kay kon nahitabo ang maong lunop isip pagsilot sa mga daotan makapaabot gayod ka nga matuman gayod usab kining giingon niya nga laglagon kining kalibotan pinaagi sa kalayo kay Dios siya matitud-anon sa iyang mga saad. Ug sa bersikulo 13-14 nag-ingon **Apan nagpaabot kita sa bag-ong kalangitan ug ang bag-ong yuta diin maghari ang katarong. Busa, mga higala, samtang nagpaabot kamo niadtong Adlaw, paningkamot kamo pag-ayo nga mahimo kamong putli ug dili masaway sa Dios, ug may panagdait kaniya.** Kini nagpasabot kinahanglan kitang magkinabuhi nga kahimut-an sa Dios. Ang bersikulo 15 nag-ingon **Ug isipa ang pagpailob sa atong Ginoo nga usa ka kahigayonan nga iyang gihatag kaninyo aron maluwas kamo”** kini nagpasabot nga samtang wala pa kini mahitabo nagpakita kini nga nagpailob ang Dios kanato karon aron kita kahatagan ug kahigayonan nga maluwas. Busa kay gituman man gayod sa Dios ang iyang giingon kang Noe makalaom usab kita matuman usab gayod kining giingon nga apostol Pedro kay usa siya ka Dios nga matitud-anon. Sa pag-abot sa panahon ni Moises misaad usab ang Dios ngadto kang Moises ug sa katawhan sa Isreal.

## II. GOD’S PROMISE TO THE ISRAELITES

**Deuteronomio 7:1, 7-11(ABMBB) “Dad-on kamo sa Ginoo nga inyong Dios ngadto sa yuta nga inyong panag-iyahon ug hinginlan niya ang kanasoran gikan niini sa dihang magsingabot kamo. Abugon niya ang pito ka nasod nga mas dagko ug**

mas gamhanan pa kay kaninyo nga mao kining mosunod: ang mga Hetihanon, ang mga Girgasihanon, ang mga Amorihanon, ang mga Canaanhon, ang mga Perisihanon, ang mga Hebihanon ug ang mga Jebusihanon. (7)Gipili kamo sa Ginoo ug gimahal niya dili tungod kay mas daghan kamo kay sa ubang katawhan. Gani kamo may labing diyutay. (8)Apan gipili kamo niya kay iya man kamong gimahal ug nagtuman siya sa iyang gisaad sa inyong katigulangan. Busa gikuha kamo niya pinaagi sa iyang gahom ug giluwag gikan sa kaulipnan sa gahom sa hari sa Ehipto. (9)Makasalig kamo nga ang Ginoo nga inyong Dios, Dios gayod. Kasaligan siya sa pagtuman sa kasabotan ug walay paglubad ang iyang gugma niadtong dili maihap nga mga kaliwatan nga nahigugma kaniya ug nagtuman sa iyang mga sugo. (10)Apan dili siya magpanuko sa pagsilot niadtong nagsalikway kaniya. (11) Busa tumana gayod ang tanang mga balaod nga gihatag ko kaninyo karon.”

Kini usa ka saad sa Dios ngadto sa katawhan sa Israel sa dihang gipagawas sila sa Dios gikan sa kaulipnan sa Ehipto aron hatagan sila sa Dios ug nindot kaayong dapit nga pagapuy-an nila nga mao ang dapit sa Canaan. Kining dapita naglangkob sa pito ka mga nasod nga gamhanan. Apan nagsaad ang Dios mapanag-iyang nila ang maong lugar. Usa kini ka dapit nga gitawag nga ‘a land flowing with milk and honey. Tungod kay usa kini ka dapit nga maayong pasabsaban sa mga sayop ug maayog abot ang yuta niini. Ug kining maong saad sa Dios natuman gayod. Napanag-iyang sa mga Israelita ang dapit sa Canaan. Gibuntog nila ang maong mga nasod.

**Josue 12:7-8** “Gibuntog ni Josue ug sa katawhan sa Israel ang tanang hari sa yuta sa kasadpan sa Jordan, gikan sa Baalgad sa walog sa Lebanon hangtod sa Bukid sa Halac padulong sa Seir. Gibahinbahin ni Josue kining yutaa ug giapod-apod niya sa mga kabanayan aron maila na sa hangtod...Kining yutaa mao ang puloy-anan sa mga Hetihanon, sa mga Amorihanon, sa mga Canaanhon, sa mga Perisihanon, sa mga Hebihanon ug sa mga Jebusihanon.” Kini naghigut nga napanag-iyang gayod sa mga Israelita ang maong dapit sa Canaan nga bisan pa sa ilang daghang mga kapakyasan apan gituman gayod sa Dios ang iyang gisaad ngadto kanila nga makapanag-iyang sa maong dapit. Ang pagpanag-iyang sa mga Israelita sa maong dapit usa ka dakong milagro, nagpakita sa dakong buhat sa Dios tungod kay tawhanong pagtan-aw imposibleng mapildi kining mga masora tungod sa ilang pagkagamhanan nga mga nasod. Apan natuman gayod, napanag-iyang gayod sa mga Israelita ang maong dapit. Kini nagpakita lamang gayod unsa ka matitud-anon ang Dios sa iyang mga saad ngadto sa iyang katawhan. Bisin pa kinig imposibli alang sa tawo apan gituman gayod kini sa Dios kay Dios siya motuman sa iyang saad.

**Josue 23:14-16** “Hapit na ako mamatay. Nasayod ang tagsatagsa kaninyo diha sa iyang kasingkasing ug kalag nga ang Ginoo nga inyong Dios naghatag kaninyo sa tanang maayong butang nga gisaad niya. Ang tanang gisaad niya natuman ug walay usa ka saad nga napakyas. (15)Oo, ang Ginoo nga inyong Dios nagbuhat alang kaninyo sa tanang maayong butang nga iyang gisaad nga buhaton. (16)Apan kon dili ninyo tumanon ang kasabotan nga gisugo kaninyo sa Ginoo nga inyong Dios o kon mangadto kamo ug moalagad sa laing dios ug moyukbo kanila, silotan gayod kamo niya hangtod nga walay usa kaninyo nga mabilin niining maayong yuta nga iyang gihatag kaninyo.”

Ang bersikulo 14 nag-ingon **16** “Hapit na ako mamatay. Nasayod ang tagsatagsa kaninyo diha sa iyang kasingkasing ug kalag nga ang Ginoo nga inyong Dios naghatag kaninyo sa tanang maayong butang nga gisaad niya. Ang tanang gisaad niya natuman ug walay usa ka saad nga napakyas. Kining Josue 23 naghigut dinhi si Josue nga hapit na siya

mamatay. Ang kataposang bahin sa bersikulo 14 nag-ingon **Ang tanang gisaad niya natuman ug walay usa ka saad nga napakyas.** Kini nagpasabot lamang gayod nga gituman gayod sa Dios ang tanan nga gisaad niya ngadto sa katawhan sa Israel ug wala usa nga napakyas. Kini nagpakita lamang gayod kanato unsa ka matinud-anon ang Dios sa iyang mga saad. Busa makalaom gayod kita sa Dios kay dili man siya magbakak sa iyang mga saad. Gani gihisgutan usab kini ni apostol Pablo diha sa Buhat 13:19 sa dihang gipahatag siyag makadasig nga mga pulong sa dihang diha sila sa sinagoga.

**Buhat 13:19 “Gilaglag niya ang pito ka nasod sa yuta sa Canaan ug gihatag kini kanila ug gipanag-iya nila kini.”** Kini nagpakita lamang gayod kanato nga kon mosaad ang Dios bisan pa kini daw imposibli matuman gayod kini kay siya Dios nga matinumanon. Madugay man ug sa madali iya gayong kinaiya ang pagtuman sa iyang saad. Ug sa atong panahon karon nga gitawag sa Biblia nga panahon sa grasya kon church age. Misaad usab kanato ang Dios niadtong mga tawo nga magtoto kang Jesus.

### III. GOD’S PROMISE TO THE CHURCH AGE (God’s promise to the people in the New Testament)

**Colosas 1:5 “Tungod sa paglaom nga gitagana kaninyo didto sa langit. Nasayran ninyo kini kaniadto sa dihang gisangyaw kaninyo ang matuod nga mensahe nga mao ang Maayong Balita.”** Ang unang bahin sa bersikulo nag-ingon **“Tungod sa paglaom nga gitagana kaninyo didto sa langit”** kini nagpasabot nga may gitagana ang Dios kanato didto sa langit. Ug kining maong panalangin nga gitagana sa Dios atong kining maangkon kon kita nakadawat sa matuod nga mensahe nga mao ang Maayong Balita. Ang maayong balita nagpasabot kini kang Jesus, ang Anak sa Dios nga siya nagpakatawo ug nagpakamatay alang sa atong mga sala ug nabanhaw siya aron paghingpit sa trabaho sa Dios alang sa atong kaluwasan. Ang tanan nga motoo kaniya ug modawat kaniya nga Ginoo ug Manluluwas sa ilang kinabuhi makalaom gayod nga makapanag-iya niining gitagana sa Dios nga panalangin didto sa langit.

**Buhat 20:32 “Ug karon itugyan ko kamo ngadto sa Dios ug sa mensahe sa iyang grasya. Makalig-on siya ug makahatag kaninyo sa mga panulondon nga gitagana alang sa tanang katawhan nga iyang gibalaan.”** Ang bersikulo naghigut mahitungod sa panulondon nga gitagana sa Dios alang sa iyang mga katawhan nga iyang gibalaan. Mga katawhan nga nagatoo na kang Jesus nga maoy ilang Ginoo ug Manluluwas sa ilang kinabuhi.

**Roma 8:17 “Ug kay mga anak man kita niya, madawat nato ang mga panalangin nga gitagana sa Dios ug madawat nato kini uban kang Cristo. Kay kon makig-ambit kita sa iyang mga pag-antos, makaambit usab kita sa iyang himaya.”**

Ang unang bahin sa bersikulo nag-ingon **‘Ug kay mga anak man kita niya, madawat nato ang mga panalangin nga gitagana sa Dios’** Kini nagpasabot nga kon tinuod gayod ka nga anak sa Dios manununod ka sa Gingharian sa Dios. Makadawat ka sa mga panalangin nga gitagana sa Dios sa umaaabot nga panahon. Ug sa unsa mang paagi aron ang tawo mahimong anak sa Dios? kini pinaagi sa pagtoo ug pagdawat kang Jesus nga maoy imong Ginoo ug Manluluwas sa imong kinabuhi.

**Juan 1:12 “Hinunon may midawat ug mitoo kaniya; busa sila gihatagan niya sa katungod nga mahimong mga anak sa Dios.”** Kini nagpasabot lamang gayod kanato nga ang pagkahimong anak sa Dios mao pagtoo ug pagdawat kang Jesus nga siya maoy imong Manunubos ug Ginoo sa imong kinabuhi. Aron ka mahimong tinuod nga anak sa Dios kinahanglan kang makabaton ug saktong relasyon kang Jesus. Busa kon ikaw tinuod nga nahimo nang anak sa Dios manununod ka niining maong mga panalangin.

**Colosas 1:12** “Pasalamat ninyo ang Amahan nga naghimo kaninyong takos sa pag-ambit sa gitagana sa Dios alang sa iyang katawhan didto sa gingharian sa kahayag.”

Kini nagpasabot nga kon ikaw tinuod nga iya sa Dios ang giandam alang kanimo mao ang gingharian sa kahayag apan kon ikaw iya ni Satanas ang gingharian gitagana kanimo mao ang gingharian sa kangitngit. Duha ra ka gingharian ang imong pilian.

**1 Pedro 1:3-4** “Magpasalamat kita sa Dios ug Amahan sa atong Ginoong Jesu-Cristo katungod sa dakong kaluoy gihatagan kita niya sa bag-ong kinabuhi pinaagi sa pagbanhaw kang Jesu-Cristo. Naghatag kini kanato ug paglaom nga dili matarog ug panulondon nga dili madunot o mahugaw o manahaw. Gitagana niya kini didto sa langit alang kaninyo.

Ang kataposang bahin sa bersikulo nag-ingon **Naghatag kini kanato ug paglaom nga dili matarog ug panulondon nga dili madunot o mahugaw o manahaw. Gitagana niya kini didto sa langit alang kaninyo.** Kini nagpasabot nga ang gitagana sa Dios alang niadtong nagatoo kang Jesus usa ka panulondon nga dili madunot, dili makawat. Dinhi sa kalibotan kon duna ka may mapanunod imong ra kanang biyaan. Bisan unsa pa nimo ka dato ug ka daghan sa imong kabtangan hindumdumi biyaan ra nimo kanang tanan. Ang pinaka-nindot kinahanglan kang mahimong manunod sa mga panulondon nga gitagana sa Dios didto sa langit. Busa kon wala man kitay igong kabtangan dinhi sa kalibotan dili ka na importante, ang importante nga makabaton kitag kabtangan didton sa langit. Ug kini ato lang masiguro kon kita adunay klarong relasyon kang Ginoo Jesus. Busa itugyan ang imong kinabuhi kang Jesus, himoa siyang Ginoo ug Manluluwas sa imong kinabuhi. Siya lamang ang imong gikinahanglan aron ka makabton niining mga panalangin nga gisaad sa Dios sa umaabot.

**Hebreo 10:23-25** “Magpabilin kitang malig-on sa paglaom nga atong gihuptan kay makasalig man kita sa Dios nga tumanon gayod niya ang iyang saad. (24)Magdinasigay kita sa pagpakita sa gugma ug sa pagbuhat sa maayo. (25)Dili nato undangon ang batasan sa panagtigom sama sa gibuhat sa uban. Magdasigay hinuon kita labi na kay nasayod kamo nga hapit na moabot ang Adlaw sa pagbalik sa Ginoo.” Kini nga bersikulo nagdasig kanato nga mga magtotoo kang Jesus sa pagbarog nga malig-on sa atong gihuptan nga paglaom nga ang mga saad sa Dios iya gayod kining tumanon. Samtang naghulat kita sa maong saad sa Dios, magpadayon kita sa pagbuhat sa matarong ug pag-apil sa mga kalihokan nga makapadasig sa atong espirituhanong kinabuhi kay ato na gayod nga nakita nga hapit na ang pagbalik sa Ginoong Jesus. Ayaw kalimot nga ang Dios matinumanon sa iyang mga saad. Unsay iyang gisaad, iya gayod nga tumanon sa madugay man kini o sa madali. Busa paabota lang, bisan pa kinig madugay kay matuman ra gayod kini.

**Habacuc 2:2-4** “Unya mitubag kanako ang Ginoo; Klaroha pagsulat ang panan-awon diha sa papan aron makalikay ang makabasa niini. (3)kay may panahon nga gitakda alang sa katumanan sa panan-awon, ug mahitabo gayod kini. Busa bisag morag dugay kining matuman, paabota lang kay moabot gayod kini, (4)Ug mao kini ang mensahe, Kadtong mga daotan dili mabuhi, apan ang mga matarong mabuhi kay matinumanon man sila sa Dios!” Si Habacuc usa ka propeta sa Dios, daghang siyang gipangutana sa Dios kay daghang siyag wala masabtan nga mga panghitabo sa iyang palibot nga gitugot sa Dios nga mahitabo. Apan giingnan siya sa Ginoo sa pagsulat sa panan-awon nga gipakita sa Ginoo kaniya ““Unya mitubag kanako ang Ginoo; Klaroha pagsulat ang panan-awon diha sa papan aron makalikay ang makabasa niini. (3)kay may panahon nga gitakda alang sa katumanan sa panan-awon, ug mahitabo gayod kini. Busa bisag morag dugay kining matuman, paabota lang kay moabot gayod kini, (4)Ug mao kini ang mensahe, Kadtong mga daotan dili mabuhi, apan ang mga matarong mabuhi kay matinumanon man sila sa Dios!”